

Brinckman, John: Nahklapp (1842)

1 Nu heww se richtig Fräden makt,
2 un all schri'n nu hurra!
3 Irst würr sick kratzt, nu ward sick strakt –
4 wen weet, wat nu kümmt nah.
5 Dat's jo sonn Ulenspiegelkram!
6 Wu is dor de Verlat?
7 Dat kann noch gor to snurrig kam',
8 holl wi nu üns nich recht tosam
9 un för't Ünwäder prat.

10 Un wat sonn rechten Schapskopp is,
11 de prøetelt nu irst recht
12 un deit sin Mul up ganz gewiß
13 un schriggt: Heww'ck dat nich seggt!
14 So müßt dat kam', as nu dat kümmt –
15 nu ward't all wedder got,
16 nu ward üns sül'm keen Hoor nich krümm't,
17 nu sehn wi all, wu schön dat stimmt
18 vun'n Kopp bet up'n Fot.

19 Man wen sin Ogen apen hett,
20 de swiggt noch'n bäten still,
21 de köfft vun sül'm sick nich un lett
22 verköpen sick keen Brill. –
23 Wat is nu witt? Wat is nu swart?
24 Un wat is nu recht los?
25 Na, wenn de Voß irst huchlig ward
26 un hüppt un häwelt mit sin'n Start,
27 denn trugt em man – de Gos.